

---

# Kloschterräbe

FASNACHT 1977

---

## Memoire-Naare schrybe Naare-Memoire

*Motto:*

*Naarre, Gangster, Pseudostare,  
alli schrybe hit Memoire.*

E Giggel z'Bärn haig schynts entdeggt,  
worum sy Huehn kai Ai meh leggt.  
Das Huehn, wo sunscht als Dag fir Dag  
Zwai Dotzed Aier leege mag,  
das brieti jetz im Hiehnerhuus  
mit gaggere Memoire-n-uus.

's isch dootestill im Affehuus,  
kai Grenn, kai Gfletsch und au kai Gschmuus,  
's git kaini glaine-n-Aeffli meh,  
kasch kain dr ander luuse gseh.  
Was wotsch, s'isch jede sich im glare,  
dr Affebabbe schrybt Memoire.

Dr Seelai Hansi, - 's isch verruggt –  
Het schynts e Blastiggfisch verschluggt.  
Sit däm ischer verhaltesgsteert  
Und het – so hämmer brichte gheert –  
die lengschi Zyt mit gspraizte Flosse  
Memoirerefirzli fahre losse.

Kurzum - wenn ain, wo sunscht als IN isch,  
merggt, dass er nimme so zmitts drin isch,  
dä iberleggt sich hi und här,  
was do drgege z'mache wär,  
und 's duet en wie-n-e Blitz durfahre:  
My Reddiggsanger sinn Memoire.

Well 's Wallis zwische Gletsch und Brig  
verkehrstechnisch im Schatte liig,  
leen d'Walliser, die superschlaue,  
e Furkabisistunnäll baue!  
Me ka us de Bonvin-Mémoire  
villicht emol dr Prys erfahre.

Bim Hubacher gäbs e baar Sache  
Wo-n-is rächt wunderfitzig mache.  
Aer macht au drum e mächtig Wäse,  
kensch's bald in de Memoire läse!  
Doch wartsch au do vergäbets druff,  
es isch wie allewyl nur - Bluff!!

's isch scho-n-efange problematisch,  
wie haillos dyr hit dr Salat isch.  
Drum liis vom G.A.W. d'Memoire  
dert inne kasch dr Drigg erfahre,  
wie d'gratis di kasch d'Wuche duure  
sälbzwait dur d'Basler Baize schnuure!

Mer sinn hit dur d'Dalbe gloffe  
Und hänn dert dr glai Nazi droffe.  
Er hylt und schluchzget, oh herjeh,  
ych find aifach kai Boschte meh.  
Dä nämnte si villicht no gärn  
als Odermattersatz in Bärn.

Am Sunntig z'Obe kasch vernäh,  
d'Abstimmig haig e Nai ergää,  
am Mäntig wird das Nai zem Joo,  
am Zyschtig wider Nai drnoo.  
Das sey au typisch fir dr ney  
Memoirestil vom Cassius Clay.

Em Nixon isch sit Watergate  
finanziell vyl abverheytt.  
Doch dangg de Gangsterboss-Memoire  
ka-n-är jetz wider Rolls-Royce fahre.  
Was in so Stories innelyt,  
Herr Cron, wär das fir Si denn nyt?

Dr Schryber Meier, Eugen A.,  
leggt sy Memoirebrille-n-a  
und suecht im Stedtli ummenand  
e Sujet fir sy näggschte Band.  
E grosse Gfalle dät är Alle,  
liess är's fir aimol aifach falle.

's isch glar, dass die Memoiresyte  
finanzielle Gwinn bedyette.  
Was aber sicher au no glar isch:  
Betrachtsch das Gschrybsel literarisch,  
denn gheert das alles, Blatt fir Blatt,  
in d'Kehrichtabfuehr Basel-Stadt!

---

Gang an d'Ladärne-n-Usstellig in dr Muschtermäss!  
Offe isch am Zysvchtig vom nyini am Morge bis am elfi  
znacht und am Mittwuchmorge vom nyini bis am elfi

---